



Uunga siunnersuut Nioqqutissanik eqqussuineq annissuinerlu pillugit Inatsisartut inatsisaata allanngortinneqarneranik Inatsisartut inatsisaat (Piffissamik akitsuutit akilerneqartussanngorfiannik erseqqissaaneq, imigassanik aalakoornartortalinnik nammineq atugassanik eqqussisinnaaneq, tikinnermi akitsuusiisitsinnaaneq aamma aningaasat atoriaannaat pillugit maleruagassanik allanngiueq)

(Aningaasaqarnermut, Naligiissitaanermut, Aatsitassanut, Inatsisillu Atuutsinneqarnerannut Naalakkersuisoq)

(Siullermeerneqarnera)

Naalakkersuisut siunnersuutigaat, angalanerup allanngornera tunngavigalugu pisariaqartoq inatsisip nutarternissaa. Soorunami tamanna taperserparput.

Taamatutaaq Naalakkersuisut siunnersuutigaat, siunissami eqqussuinerlut akitsuummik akiliisoqartarnissaanik periarfissiisoqassasoq soorlu viinninut cigaritsinullu mittarfimmi, annertuallaamik pisisimagaanni. Tamanna ajoriffissaqartinngilarput, ersissutigarpulli, pisortat allaffissornerannut aningaasartuutini annertusaataanerani kinguneqarnissaa. Taamatut isumaqarneq ataatsimiititaliangortussap sukumiisumik misissortariaqassavaa.

Naggataatigullu inatsisissatut siunnersuutip imaraa uanga nammineerlunga siunnersuutima piviusunngortinnera tassa, siunissami inuinnaat immiaaqanik, viinninik imigassanillu kimittuunik eqqussinissaat periarfissaqalissasoq. Tamanna nuannaarutigaa, namminerlu uanga, tamanna siunnersuutigigaku UKA 2022-imi. Isumaqaanngilangali, Naalakkersuisut siunnersuutiga tamakkerlugu aalajangiukkaat. Tassami Naalakkersuisut siunnersuutigimmassuk, privaatit eqqussinermi eqqussuinerlut akitsuutip naliginnaasup saniatigut 50 procentimik ilassutitut akitsuuserneqartassasut. Tamanna siunnersuutinni siunertarinngilluinnarpara, neriuppungalu, ataatsimiititaliami isumaqatigiissinnaassalluta, tamanna tulluanngitsoq.

Kissaatigaara, atuisut ilumoortumik periarfissinneqassasut soorlu assersuutigalugu belgiamiut immiaaraannik, chilimiut viinniinik skottillu whisky-nik eqqussinissaminut. Naalakkersuisut eqqussinermut akitsuutini akiliutinillu tassunga atasunik nutaanik nassaanngikkaluartut. Soorunami atuisut eqqussinermut akitsuut nalinginnaasooq akilissavaat, isumaqaanngilangali, pissusissamisoortoq inuinnaat akitsuummut 50 procentimik akileeqqittassasut.

Paasinnillunga siunnersuut Aningaasaqarnermut- aaqmma Akileraartarnermullu ataatsimiititaliami sukumiisumik suliareqqinneqarnissanut innersuussutigaa.